

ŠENTENCIJA MESOPUSTA

TRAPAVAC

SUDAC: RENE ŠEVERDIJA – TESLA

ABUKAT: DANIEL GRBIĆ

AUTOR: RENE ŠEVERDIJA – TESLA

SUDAC

Mili ljudi poštovani
Pozdravljan vas kot i lani
Ovo meni čast je vela
Sudin ispred svoga sela

Zavo su mi nauk dali
Dedi dokli bil san mali
Običaji da sačuvan
S tin se budin i obuvan

Zijala bi majka v dvori
Bolje neka selo gori
Koda slušan ju esada
Neg da običaj propada

Ov naš traje dva tri vika
S čovika gre na čovika
Kašnje nas te niki mlaji
Sebe dat za običaji

Komu milo komu drago
Ovoj naše velo blago
Bribir fanj je toga zgubil
Ovo kad bi bin se ubil

-1-

O bibrski puče dragi
Sil još va kakovoj snagi
Redon pozdrav krenut mora
Od vašega autora

Od Cirkula do Kričini
Pozdrav starcen i dičini
Od Martina do Barbari
Sih pozdravlja lupež stari

Ki z Bribira sad ste dugo
Simi pusa a ča drugo
Dal van fali rodna gruda
Mi ne gremo odovuda

Odovod su naši deda
I matere i besedi
Tuj vezana naša cima
Lipšega na svitu nima

To nij samo moja misal
Mažuranić takoj pisal
Stari ban z grada Novoga
Autor je stiha toga

-2-

Sada dajte malo mira
Da se dva put ne diktira
Mesopustu gremo sudit
Niš dobroga nen ponudit

Staromu neprijatelju
Ispunit ću jednu želju
Va zdelici i na pladnji
Prneste mu obed zadnji

Zač kašnje mojega suda
Više neće odovuda
Nego će na čistu sredu
Poć svon ocu i pradedu

Abukate stara beno
Znaš da tako muj sujeno
Prija tebe su provali
Si su redon najebali

TAMBUR

ABUKAT
Abukatsku čast obavljan
I odreda sih pozdravljan
Se divojki i snašice
Palandri i njuferice -3-

Su gospodu našu velu
Ča diše va ovon selu
Ponosno pred vami stojin
Nikogare se ne bojin

Sucu pina gre na usta
Obranit ću mesopusta
Činjenice se ne sramin
Da badave njega branin

Malo svojin mozgon vladaj
Poštenoga ne napadaj
Zač i ja san nič studiral
Bez kuferti diplomiral

Vidin kakov čovik ti si
Paradu pozdravil nisi
Kapetani muzikaši
Mesopustovi pajdaši

Ti svoju pravicu tiraj
Ma se njimi ne zamiraj
Zač dečkon to teško pada
Kad jin brata se napada

-4-

Valje si me sega smutil
Nis pozdravi si uputil
Abukatsko vijeće zbori
Da pozdrave se sponzori

Za si ljudi srca vela
Leti pozdrav z moga sela
Dok nij prišlo još do gusta
Pozdrav i od mesopusta

Upravo mi kurac puca
Za te tužbi i za suca
Pred ljuden se prenemaže
Nikakor da niš dokaže

Stalno rivaš mi na silu
Za ždribe i za kobilu
Sjaši malo ti sa njega
Čagod pitaj i Prebega

Povidit gren zač me srbi
Tompson pival je va Vrbi
Kad je noć Bribir pokrila
Stižu ždribe i kobila

Nis do kasna tamo sidel
Na svoje san oče videl
Niku doba za pol noće
Kobila va Vrbu oče

Ki su fanti tu ju bili
Va Zagriži otputili
Za sveti duh su dospeli
Ma auto stiže veli

Goran Prebeg doma žuri
Vnuk od Petra toj Koburi
Limuzinu vozi velu
Najbržij va našen selu

Kobila se v noći nudi
I dosegal juj audi
A još je i njeno ždribe
Finilo ispod getribe

Kašnje da sej utvrdilo
Šćej to blago zaprav bilo
Štetuj platil hametice
Konji samlel v kobasice
TAMBUR

SUDAC

Nikako se uvik zvlačiš
Kot i kačka kožu slačiš
Ruki pereš ti od sega
Očil kako spasit njega

Povij mi sad šćaj sramota
Ča na Vrbi nij kažota
Ki da zato odgovara
I čaj prazna željezara

Pak za petran milog Boga
Po čaval greš do Novoga
Ćil svitliju ili škuru
Kraljevicu po pituru

Po dva črafi i maticu
Moraš skočit Crikvenicu
Ako rabiš pak motiku
Morat oć potegnut v Riku

Čaj oprto se zapira
To daj moda od Bribira
Novu vlast tu neću mišat
Nisu stigli još ni pišat

-7-

Mor to zna već saka bena
Ovdi vlast je prominjena
Svedočilaj stara kula
Da sej pljoča obrnula

Lani kad sej zibiralo
Kandidatih jako malo
Šentenciji tako piše
Samo Zagreb dal je više

Na kantah ča su za smeti
Polipljeni su portreti
Spoja, Grbić, „parče pice“
Kot i strašila za tice

Zube, Karlić, Rokić, Jere
To koga god i prosere
Ni kampanja bila duga
Ma sej šlo do drugog kruga

Oteli su narančasti
Isto se dokopat vlasti
Udrili su tu va tesno
Narod ov put šal je desno

-8-

Paj većina glasih dana
Za Karlića Marijana
A i ti si branitelj
Va općinsku sel fotelju

Ne veruje moje selo
Daj črvljeno već zbledelo
Va crikvi san križ poljubil
SDP-ej Bribiri zgubil

Suzaj šla niz oko moje
Vinodol je plave boje
Otel oni ča ponudit
Za ko leto oću sudit

Ministri su bili totu
Sača obećali sprotu
Proširenje simitira
Novi centar od Bribira

Još velo parkirališće
I za dicu igrališće
Za KUD sredit Sokolanu
Načinit te i kuglanu

-9-

Oćemo se zato strpit
Pa je malo i potrpit
Kad smo mogli majko sveta
Ovih prija dvajstri leta
TAMBUR

ABUKAT
Ne zamiran to trubili
Zač nan prete vele sili
Duže vrime su na vagi
Donald Tramp i vođa dragi

Ki će prvi putac stisnut
Šća će mater jače vrisnut
Bolje vodu da ne mutin
S ćoška se to prati Putin

Još ako se on umiša
Črvljena će kropit kiša
Bogu molin se da nete
Poć se minjat za rakete

Visoko su navoj listi
Muslimanski teroristi
Kunu se va Muhameda
Pa raznesu se odreda -10

Merkelica Anđelika
Podhitno da rabi lika
Od doktorih pomoć traži
Med nogami već ne vlaži

Mesopust toj staroj mački
Šalje v lončići pljuvački
Neka se potare doli
Onda klizi i ne boli

Zajašit more Makrona
Ako će i bez kurtona
Da ne rabi već kurtoni
Ni Silvijo Berlusconi

Neću rivat prst va uho
Nami kladu ga na suho
Jebeni smo ljudi moji
Tuji našu robu kroji

Čudna govna već seremo
Nij ni čudo ča žeremo
Kupiš jabuki butigi
Šest miseci si bez brigi

S kakova su drva znete
Nikadare žnjilit nete
Pomidori i papriki
Kot i da su od plastiki

Lidli i va Interšpari
Kupiš voće ko ne stari
Još i meso braćo draga
Da ne znaš od kogaj blaga

Kako skuhat gulaš pravi
Kad z Vijetnama pridu kravi
Smiluj mi se Bože sveti
Kot opanak su kotleti

I ćoravo oko vidi
S pomidora sok ne cidi
Na kon suncu to sej grelo
Ili sunca nij videlo

Narod žere čaj cenije
A ne ono čaj finije
Mali čovik to ne bira
Tako drugi nan diktira

Doseglaj nas Božja kazna
Slavonija napol prazna
Dokončali tuji tati
Doma uzgoj se ne splati

Ne veruješ moja diko
Skuplja voda nego mliko
Carsko meso za dva ručka
Košta kot i jedna lučka

Kobasice još prodaju
Četrnaest kun da koštaju
Ta mora bit jako fina
Da ti pizda materina
TAMBUR

SUDAC
Iman jednu sriću ludu
Ča san va bibriskon KUD-u
Prošlon leti moj nebore
Šli smo i do dijaspore

Va Posušju sej tancalo
Zeru nas je napuhalo
Međugorju još smo bili
Pred Gospun se prekrížili -13-

Ki ne vole i ne moru
Nij se saki popel zgoru
Autoru doli kapa
Šal je zgoru pri dva šćapa

Družinaj još ova stara
Potegla i do Mostara
Kafu pili a ne soki
Gljedali v Neretvu skoki

Drugi izlet kumpanija
Drito pravac Slovenija
Nas je volja zato gremo
I očemo i moremo

Na kraji gre karavana
Va Slovačku na tri dana
Neka se i to pročita
I općinska gre elita

Niko od njih tako zbori
Bratimit se gremo gori
A mi tancat i tamburat
Uz vinoj to lipše zdurat

Rano prišli smo i trezni
Kadij zastor bil železni
A večer smo niku dobu
Hrvackon tancali grobu

Ne moreš čut jako često
Da se tako zove mesto
Ma petsto let tako piše
Hrvatski puk tamo diše

Z domaćimi ljudi naši
Vjutro bili smo i k maši
A kašnje po nikon redu
Skupa š njimi na obedu

Autobus sada smira
Krenut nazad do Bribira
Pivaju se sake note
Austriji pišat ote

Pol eura za znet miša
Nikoli se već ne piša
Neće praznit tu mihura
Neda centa ni eura

Jedva da smo i krenuli
S postolih su nas tu zuli
Milicija na kotači
Još je zovu presretači

Ta Gestapo srca nima
S tahografi nič ne štima
Mujagina sad Anita
Zna zajik pa kaznu čita

Da napustiš ovo mesto
Euri hiljadu petsto
Bil našli tuliku kesu
Da nas naopak pretresu

Se Anita to prevađa
To nij kazna nego krađa
Sirotinja mi smo vela
Mor pol od nas i ne dela

Živci su mi već fanj tanki
Zija Senka z Erste banki
A i Luna mij va seli
Krepat oće bez padeli

Pa karticu z taški znima
Više ih u sebe ima
Ksenijaj jedina šansa
Za greški Autotransa

Kartica se popeglala
I bus kreće Bogu fala
Mesopust to znat će cenit
Senku provat će oženit

Firma joj je vjutra bila
Veli trošak namirila
Pusa obadva šofera
I velika Bajadera
TAMBUR

ABUKAT
Ne skači na zadnje nogi
Zada pleć ne kaži rogi
Ovin s KUD-a ne dan ruku
Ako tebe sobun vuku

Ti budalo jedna stara
Na put pojdeš bez dinara
Dobro nisi na sa usta
Zato tužil mesopusta

-17-

Već zdavni ne gre van s kuće
Zač da vani muj prevruće
I nij sidel po sezoni
S Goranon va kamioni

Na Gorana mislin Mera
Pajdaša mi čaj s Kičera
MAN-a vozi ne zastavu
Toj kamion za dostavu

Pijaču va njemu pelja
Takoј nigda otac Želja
I ručnik je okol vrata
Istoj tako delal tata

Sanjinovi kamioni
Goro minja kumpanjoni
To normalan teško zdura
Kakovaj temperatura

Marijo mij to povidel
Kot i suvozač je sidel
Daj sauna va kabini
Po dani i misečini

-18-

I Vedrić je vukal gajbi
Cidil sej spod šoferšajbi
Va kabini duro stenje
Daj globalno zatopljenje

Preslače se kako nete
Tri majice do desete
Nij njin jasno milo moje
Drugi ljudi se ne znoje

Kamion je već bil prodan
Pa moran i to da dodan
Novi vlasnik je z Novoga
Ne zna čooće od ovoga

Ej Sanjine daj me spasi
Kako grijanje se gasi
Jel na plavo il črvljeno
Grije kodaj zavareno

Grel se smet il oće rulit
Počelo gaj v oki žulit
Ni moji to nisu bili
Celo leto dokučili
TAMBUR

SUDAC
Velo društvo glavi bistre
Na izlet gredu do Istre
Kolendari to se sinja
Ta dan slavi se Martinja

Va Istri te popit jače
Ta dan vino se pretače
Dobra zuba i želuca
Dal in se esada štuca

Gre Davor i Grbić bena
I Mihajla uz Arsena
Jelena ča uči dicu
Uz Elenu pajdašicu

Obidvi su muži zele
Da se skupa provesele
Zaokružiti gren pošteno
I Doris je tu i Neno

Velo društvo sebe rada
Još naziva „požerada“
Sidra su se tako digla
Pravac Istra Brtonigla

Od konobi do konobi
Rezervirane su sobi
Kad se dobro natankaju
Brtonigli spat ostaju

Praveli su to nij malo
Ča sej ta dan se provalo
I divljač i kobasice
I tartufi i šurlice

Vino mlado vino staro
Grapa, biska i amaro
Kasno v noći ne za dana
Prišli su do apartmana

Arsen stal je ženi bliže
Od tartufih mu se diže
Kad bu vajer nogi digla
Neka praši Brtonigla

Evoj Arsen na Mihajli
Ma pod štramcen nisu sajli
Treščicej pod štramac klalo
Koda dite sej igralo

Muž i žena dvi su riti
A bome i gabariti
Jebačinaj njin presela
Ode krevet na tri dela

V jutro gazda se ne žali
Toj kupil za soldi mali
Sto euri za postilju
Štokrle i su mobilju

Neću van naplatit štetu
Pridite mi opet kletu
Za pijani i za trezni
Kreveti te bit železni

Drito s Puli Bogu fala
Čaj armija otpisala
S ovin oću oganj snitit
A i štramac ću zahitit

TAMBUR

SUDAC

Gren pokrenut se esada
Pa proć kuda gre parada
Ov put kreće se s Cirkula
Va krvij već jedan-nula

Rakijun se liči rana
U novoga kapetana
Već ki god i grdo štuca
Kad sej pilo u Veuca

U Svetići ajme meni
Nogomet je va bazeni
Daj zericu dublja voda
Podavili bi se koda

Još su žensko va ton seli
Na magaricu poseli
Simij već pomalo jasno
Da Kičeri ote kasno

Kot va magli da su guski
Pa kapelnik dili pljuski
Kašnje mij povidel niki
Krivi dur na harmoniki

Drugi izlaz mi se čini
Gre od Sonji na Kričini
To se selo brže mine
Z davni gori nij dičine

Ma ščekuju pusti dvori
Kad se pride va Podgori
Puno veće je to selo
Tamo uvikij veselo

Pisma a ne čuvarina
Va konobi u Marina
Vina taj konoba puna
Rešili su dva bocuna

Oduška su srcu dali
Pivali i tamburali
Totuj Mer pokazal klasu
Virtuoz je on na basu

Ta dan još se malo mučin
Nikakore da dokučin
Mislin Rošće selo malo
Sedan ur sej pozdravljalo

Već je eto vikend tret
Pomori in Bože sveti
Evo zore evo dana
Pozdravlja se doljnja strana

Dečkon nij objasnit lako
Tu pismu ne voli sako
Ni po dani ni va škuri
Nete Bobana ni Juri

Vavoj kući neć to pivat
Zač se oćeš nadobivat
Sprotu se zapira lesa
Da ne pride do ekscesa

Da ne delan dalje griha
Povidit ću ovo s tiha
Oćel kletu na Solinu
Ki zapivat marš na Drinu

Zato stižu se pofale
Subotu se gre va štale
Delat ote duže stanki
Zač zapolne nij čajanki

Napete su vratne žili
I oprti si ventili
Dal daš vino il rakiju
Ča narediš se popiju

Do vrh Štal je bil potegal
Lovro Krstić tuj zalegal
Daj rakiju pil kot vodu
U Grbićaj sad na podu

Čudilo sej i magare
Na podi se dečkić tare
Još va dvori sej posralo
Kad je Lovru otpeljalo

Bil sej zbudil pravi meni
Tamo nigdi va Kostreni
A doklij do Riki stigal
Još četiri put je rigal

Zadnji pozdrav od paradi
Tu večer je pal va zgradi
Pobrali su niki tati
Vatrogasni aparati

Okol grada su gasili
A da nisu ni snitili
Rapaja će to napunit
Stanari se nete bunit

Del muziki naše male
Do kasnaj pozdravljal Štale
U Švrakića Marijana
Pili su do drugog dana

Čagod zide na videlo
Zadnje se pozdravlja selo
Na Gradac gren z Dragaljina
A ekipa u Picljina

Željka obed na stol klade
Rešila sej već parade
Kot san lačna zija žena
Evo Mera i Lepena

Pomori in Bože sveti
Lepen nikad nij na dijete
Kako lipo vase smata
Juha, glavno i salata

I vino mu klizi glatko
Još spićuje jel ča slatko
Dok oči žerilo vide
Ne diže se taj s katride

Kodaj kuću pomel vetar
Lačna Željka lačan Petar
Oće zazvat evdi zvani
Čaj v padeli u Dijani

Kij spazil da dva pod ruku
Kalanja po podi vuku
Ča muj kadi v čaši klalo
Sej va njemu otkazalo
TAMBUR

ABUKAT
Sada gren povidit malo
Kakoj ime to nastalo
Padali su muži, ženi
Paj na pamet palo meni

Do Srećka ću v malo selo
Tamoj ovo se počelo
Kad je šal protegnut nogi
Kavranicu va šparogi

Auto ostavit oće
Gori poli spomen pljoče
Tudaj uvik šparog bilo
Mogal bi ulovit kilo -28-

Biserka to voli jako
Njoj ugodit će sakako
Ma ga noga slabo služi
Sun težinun se opruži

Fala minjanomu kuku
Dočekał sej bil na ruku
Redon je dozival Bogi
Prosule su se šparogi

Jel bil Bože jako kukal
Do auta sej dovukal
Rukaj pukla ljudi moji
Ma su šparogi na broji

Veli vožnja odozgora
Jednun rukun daj pokora
Druga muj ostala visit
A još mora prisnac misit

Biserka gaj ov put bila
Va ton delu zaminila
Vnuk zija da prisnac vredi
Alij bolji on od dedi

TAMBUR

-29-

ABUKAT

Drugi pad je alaj vera
Na početki od Kičera
U Milice krvopije
Da su črišnje najzrelije

Stubicaj već narejena
Braco će brat a ne žena
Dok Milica pride z dela
Oće pobrana bit cela

Velaj zrasla ta sotona
Dosizat oće z balkona
Ne bi dite tako bilo
Stubicu naprndočilo

Jel bil ku rakiju popil
Zač ozgoraj brzo hljopil
Kadij kraj od ove muki
Prebijene obi ruki

Jel ga Bože kašnje bila
Milica ča pofalila
Ki će kuhat sad lazanje
Mora oprit bolovanje

-30-

I va seksi problem mali
Za predigru ruka fali
Svojun oće Bože sveti
Muževe su va longeti

Isto selo malo dalje
Trapavac nan pozdrav šalje
Na črišnju sej popel Hari
Ča va općini redari

Naprtil sej pun je moće
Košić črišanj nabrat oće
Jutro dokli pride z dela
Željka će spec dva štrudela

Jel mu sunce šlo va oko
Na črišnjij bil fanj visoko
Kodaj grani podmazalo
Grdo mu sej pofuzalo

Šal je zdolu okomito
Naopak na glavu drito
Jedva gaj poznala žena
Saj glavina razbijena

Drugi dan va stih to kladen
Zamotan je kot Bin Laden
Niki mora ovo platit
Oće pilun črišnju skratit
TAMBUR

SUDAC

Klal san najlipšu stomanju
Zač gren k maši na Stipanju
S manun gre i moja dama
Ne pušta me rada sama

Va crikvi se mesto išće
Srićun veloj tu dvorišće
Samo vrime da posluži
Da se narod malo družu

Stol postavljen bil je sprotu
Sega sej naneslo totu
Tuj va seli čeljad vredna
Ne smi lačna bit ni žejna

Redon provaš pune taci
Bazlamače i prisnaci
Sir i pršut i slanina
Črnoga i bela vina

Ki žesticu ote prije
Sakakovej tu rakije
Kad sej se potamanilo
Vrimej već obedu bilo

Sad se spravlja mala četa
Va konobu do Potpleta
Gredu samo odabrani
Zač počelaj škropit vani

Zamjenik od načelnika
Mira Mili kapelnika
Dvi Picljinki, dvi Tusove
Neka ovo blagoslove

Ive, Rajko Ivančina
I Kobura i Dorina
Nives, Denis i Dragana
Oni su tu još od rana

Jurica i žena Biba
Isto je spomenut triba
Priselili z metropole
Susedi se družiti vole

Marijo i Nikolina
I autor i Martina
Tamara ča vlasi striže
S mužen drito z Riki stiže

Arsen je s Mihajlun doli
Rođaka on jako voli
Frankaj prošla ki ju išće
Zeton drito v rodilišće

Hćer Andreja tamoj bila
Za ki dan je i rodila
Va konobi društvo pije
Koga oće šundrat prije

Anka grli Danijela
Sej to za boljitak sela
Črvljene se tu i plave
Partizani Božić slave

Stare pismi su va modi
A saku Dorina vodi
Kuliko sej totu pilo
Pomalaj i zaškurilo

Popuštaju nišći zglobi
U Ivana va konobi
Previsokaj potpetica
Prvaj tresnula kraljica

Kraljica od karnevala
Bez vetra sej zavogala
Paj otresla temeljito
Va staru kredencu drito

I to dva put ne jednučka
Fali na kredenci ručka
Ča zaslužiš to dobiješ
Kad paljkon rakiju piješ

Maloj puhnul jači vetar
Kako sej opružil Petar
Po celoj svojoj dužini
Po podu ne po Dorini

Bržej čašu vina popil
Da ne bi još jednuč hljopil
Za kiticuj još ostalo
Kad gaj doma otpeljalo

Zet od Franki na brzinu
Pelja Petra i Dorinu
Vozi je va gornje selo
Zač je Peru oduzelo

Dorina gre v kuću sada
Zabilaj da muž je zada
Ravnotežuj znova zgubil
Glavinun asvalt poljubil

Poziv je od zeta stigal
Jel ki da bi Petra digal
Tvrda glava Bože sveti
Jutro ranoj va Bufeti
TAMBUR

SUDAC
Par dan za tin lipa slika
U staroga kapelnika
Jel fuzala se zbog pića
Mira Mili Dundovića

Navuklaj sandalu tesnu
Prekinula ruku desnu
Mile da pomore ženi
Okrenulo ga v kolenu

Komaj bolit ga prestalo
Gre paradi pomoć malo
Pozdravlja se dolnja strana
Već je sablja u Milana

S Kosavina do Mikuli
Piju kot i žedne muli
Mile maloj zišal štosa
Livadij pokrila rosa

Tu njegovu kreću jadi
Opružil sej na livadi
Srića da su bele gaće
Pa ne vidiš fleki maće

Va četrtroj su brzini
Penju se po Poduljini
Od Taraših do Rokića
Pelja jedna staza pića

Ki sej sitil vidi čuda
Da popriko ote tuda
Toj za mlajahna čovika
Ne za stara kapelnika

Jedan snima drugi bliju
Milej pal va provaliju
Jel ga Bože rinul Roko
Daj šal zdolu va duboko

Otel gorsku službu sada
Ili će ga zvlíč parada
Se su snimki pregljedane
Sam si hljopil moj Milane

Neću Milu špotat sada
Poduljini nij Mirsada
Onoj Mislav Bogu fala
Slova su se pomišala

Trapavčino glavo šupa
Još ti zeru srce lupa
Od paradi se oprosti
Vele da si živel dosti

Sav se narod s manun slaže
Abukat ti oče maže
Ovuda već klatit nećeš
Na počinak zadnji krećeš
UDARAC SABLJUN

OSTAVINA

ABUKAT

Niš se simo ne rivajte
Oporuku poslušajte
Osjetil je daj kraj blizu
Paj oročil bil devizu

Na dvajset let oročeno
Toj paradi naminjeno
Kućuj napisal na ženu
Kucka oće dat Lepenu

Leu našen precjedniku
Od bivše divojki sliku
Neka brzo na nju zabi
I kakovu novu zgrabi

Nismo nego za na jamu
Kad nimamo prvu damu
Na Grbića i Davora
Oće pazit odozgora

Oni nisu više dica
Dobra bit će i dovica
Samo nek je naše vere
I daj mlaja od matere

Kapetanon nove ure
Da po seli ne zaškure
Kapelniku mili Bože
Za bubanj od čagljih kože

Zač Vitine fanj koštaju
A pol sela ne duraju
Dva poklopca od padeli
To za Šarca su čineli

Općinari naša dika
Njin ostavlja pročelnika
Zač su staru pročelnicu
Preselili va knjižnicu

Facada na staroj školi
Za to delo kapa doli
Toj uvjet bil niko veli
Da se Željka tamo seli

Načelniku bez pardona
Šljiv afričkih dva kartona
Za dvojicu delat oće
Zamjenik nij od pomoće

Zapišuje još kiticu
I za Olgu dohtoricu
Mesopust joj tu ostavlja
Pun maštelac dobra zdravlja

Uvikij na ruku bila
Mirovinu zaslužila
Vela pusa a ča drugo
Sada nek uživa dugo

Prišlaj zamjena z Novoga
Kot i lutka čaj z izloga
Dohtorica lipa mlada
Punoj muških bolno sada

Pojdeš zgoru ča mi praviš
Va nju gljedaš i ozdraviš
Nij u ove dohtorice
Ni zela a ni šćirice
TAMBUR

SUDAC
Novu masku i peraje
To našem popu daje
Povidit se ovdi mora
Voli školjki znimat z mora -41-

Gljedali smo na fejsbuki
Za to ima zlatne ruki
Už negaj i plava vila
Da bi školjke očistila

Legenda po seli kruži
Da se z davni s popi družī
Kij pomislel sran ga bilo
Da se drugo ča čistilo

Krstiću ostavit oće
Tableti proti bjesnoće
Napalaj to biće drago
Bolest ča napada blago

Povidit ću stani malo
Podgori sej pozdravljalo
Bele gaće, trobojnica
Za paradun će Ivca

Obać selo najmilije
Va se vlet dvi tri rakije
Ne znan točno va ku uru
Dobil je temperaturu

Zija da ga selo čuje
Triba vaŕgat se čaj tuje
Grize, hita okol sebe
Neduŕan tu svat najebe

Na Rudinah grda slika
Jel za ovu bolest lika
Ki će dat mu savjet pravni
Daj rat ovdi finil z davni

Da su zvali tu likara
I Stevu veterinara
Jel dobil ki ča pod oko
Doma gaj odvukal Roko
TAMBUR

ABUKAT
Koru lisnatoga testa
Rukavice od azbesta
Da joj se on ne zamiri
Frizerki ostavlja Miri

Rukij bila ofurila
Doklij vinac ugasila
Mišala se tu palenta
Gori vinac od adventa

Gori vinac na srid stola
Tableticaj odozdola
Blagi Boŕe budi s nami
Gasi golimi rukami

Srića već ne šiša ŕena
Desnaj jako opećena
Brzo sej ohovistila
Mater bolnicuj vozila

Va Riku za petran Boga
Majki Mici trne noga
Sestri su se nadelale
Dok su karton nje iskale

Ne zna Mice čaj bolnica
Pateka ni dohtorica
Zadnji put špitali bila
Kad je Pipina rodila

Isto ime isto greška
Sad je Mira to Peteška
ŕivi na vrh našeg sela
Sama mij to povidela

Nij to bilo tako davno
S Mirkon zgoru gre va Ravno
Prozračit gre kuću Mira
Skopat oće dva kronpira

Ma va Ravnon zrak je drugi
Tribaju rukavi dugi
I za nogi grize jače
Debele gre navlič hlače

Preslači se ki ju vidi
Oće lakše ako sidi
Nij mića rit nego vela
Na šporhet sej tu posela

Ki bi se vrag na to sital
Daj Mirko već oganj snitil
Metar vajer skaže žena
Cela rit je opečena

Drugo jutro hametice
Gre Mira do dohtorice
Maži mast ča daju puhi
Misec dan spi na trbuhi

Ostavlja joj ov Trapavac
Friški jogurt i krastavac
Da se koža lipše sviti
Ako maže to po riti
TAMBUR

ABUKAT
Ostavina jedna zlatna
Tri četire bale platna
Tanke spužvi dva vagona
Sto dvajset kil silikona

Za Udrugu poklon mali
Ka brine o karnevali
Kako naša maska zgljeda
Brinu i ovoga reda

Kakovaj to jagma bila
Da bi maska se sašila
Doznal san to ja od Mići
Si bi stali va dva fići

Nij baš skupa ovog leta
Za nju kupiš pol teleta
Ako ih gre s kuće više
Hipoteka se zapiše -46-

Nikomur nen pamet solit
Kad nič delaš moraš volit
Morebit ja nis u pravu
Jel vrime za ključ va bravu

Petarde, napolitanki
Dvi špekule porculanki
Toj još darak za Lepena
Odrast oće je vrimena

I za kletu magaricu
Ma ka nima padavicu
Parada pozdravlja duže
Zač nogi ovu ne služe

Za nošnjice gre beseda
Se pofale ovog reda
Prija nego otputuje
Još jednučka je kušuje

Zadnji put je moli etu
Da takove budu kletu
Već esada moru zbrajat
Misec dan te duže trajat

TAMBUR

-47-

SUDAC

Poručak je još na kraji
Za stariji i za mlaji
Ki ste vezani na lanci
Dokli su Bribiri tanci

Mesopusni teku dani
Njilite na otomani
Teškoj korak v salu pružit
S mačkarami se podružit

Popit gemišť ajme meni
I va tuje bećit ženi
Domaći tu čovik fali
I na šanki i va sali

E daj vrime vrnut kako
Autor bi volel jako
Kad je štokrl bilo malo
I z balkona sej snimalo

Biloj živo i veselo
Jako zavo sej živelo
Šentenciji tako piše
Ča od toga tribaš više

-48-

Ni Bog pravo več ne sudi
Često zimlje dragi ljudi
Zapisano daj to simi
Zato neka draga dimi

Za kletu se saberite
Ki ste bolni ozdravite
Više seksa i ljubavi
Onda redon si su zdravi

Ja gren sada malo plovit
Savudriju ribi lovit
Ako me dosegne kazna
Kasica mij zdavni prazna

Oću klast v kufertu miću
I tresirat Plenkoviću
Neka kazni na stol slažu
Za ku novu arbitražu

Obed mi sej več ohladil
A i vami san dosadil
Jutro bit će se gotovo
Kad pojdemo na Čokovo
TAMBUR

UDRUGA ZA MESOPUSNE OBIČAJE BRIBIR ZAHVALJUJE SVIM
SPONZORIMA A POSEBNO:

NARODU BRIBIRA

OPĆINI VINODOLSKOJ

ŽUPANIJI PRIMORSKO GORANSKOJ

IVICI ROSU

AGENCIJI KATARINA LINE OPATIJA vI. KATARINA HAUPTFELD

KTD VODOVOD ŽRNOVNICA

I SIMI OSTALIMI BEZ KIH NE BI MOGLI ODELAT OVE MAČKARE